

Kempen boikot PRU14, mainan kotor Umno

SINAR HARIAN

23 JANUARI 2018

SITI ZUBAIDAH MAT ISA & MUHAMMAD SHAMSUL ABD GHANI

PUTRAJAYA - Kempen Jangan Mengundi PRU14 sengaja dibuat untuk mengelirukan rakyat dan bertujuan memberi kemenangan kepada Umno dan BN.

Pengerusi Pakatan Harapan (Harapan) Tun Dr Mahathir Mohamad juga mendakwa pihak yang memulakan kempen boikot pilihan raya adalah orang Umno sendiri.

"Ada segelintir orang yang buat promosi boikot pilihan raya. kebanyakan mereka ini datangnya dari parti sebelah sana, parti Umno. Kononnya tidak ada beza antara Harapan dengan Perdana Menteri Datuk Seri Najib Tun Razak, tak payah undi, rosakkan kertas undi. Macam-macam lah (kempen).

"Mereka tahu, kalau ramai tidak mengundi, ia akan bantu Umno dapat kemenangan. Objektifnya bukan sebab masalah dengan Harapan yang konon tidak (lebih) baik daripada kerajaan Najib. Mereka kata kalau mengundi pun, apa anda dapat," katanya pada sidang media di Yayasan Kepimpinan Perdana, hari ini.

Sebelum ini tular kempen anti PRU14 yang menyebarkan mesej dengan tanda pagar #UndiRosak atau #SpoiltVote, dan #ProtesPRU atay GEProtest.

Kempen ini didakwa susulan keputusan Harapan menamakan Mahathir sebagai calon perdana menteri.

Sebelum itu, sebuah laman baru di Facebook yang diberi nama 'Undi Rosak' memuat naik kenyataan 'Rakyat yang sangat muak dengan politik BN dan PH, memang mempunyai hak untuk tidak mengundi atau hak untuk undi rosak'.

Dalam pada itu, mengulas lanjut Mahathir berkata, Harapan dan BN banyak perbezaannya.

"Kita semua tahu banyak perbezaan Najib dengan calon Harapan. Program kita bukan sekadar tukar kerajaan kepada kerajaan baru, tetapi menukar struktur kerajaan.

"Ramai yang berpendapat, kuasa perdana menteri diguna oleh Najib keterlaluan malah mengawal semua 'mesin kerajaan'. Tidak ada lagi pengasingan kuasa antara bidang kuasa eksekutif, kehakiman dan perundangan. Itu sebabnya Najib perlu pergi," katanya.

Katanya, beliau tidak seperti Najib yang 'mencuri' duit rakyat walaupun 'lahir' dari parti yang sama Umno. Tohmahan itu sengaja dilemparkan mereka yang berfikiran cetek.

"Negara ini perlu berubah. Jika tidak, saya tidak akan berada di sini. Saya sudah 92 tahun. Saya sendiri tak mahu jadi perdana menteri.

"Tetapi rasa bertanggungjawab dan ada berpengalaman sejak 1946. Saya pernah hidup di zaman kolonial, Jepun dan saya tahu sedikit pasal politik. Dengan pengalaman ini, saya boleh bantu kerajaan selesaikan banyak masalah yang dicipta Najib. Dia sedang menjual negara ini kepada pelabur asing," katanya.

**© 2017 All Rights Reserved • Karang kraf Group Media • © 2017 Hakcipta
Terpelihara • Kumpulan Media Karang kraf**

Source: <http://www.sinarharian.com.my/politik/kempen-boikot-pru14-mainan-kotor-umno-1.787886>